



**DEPUTACIÓN PROVINCIAL
A CORUÑA**

Servizo de Acción Social, Cultural e Deportes

Expediente: 2024000043886

RESOLUCIÓN POLA QUE SE APROBAN AS BASES DO III CERTAME “FONDO DE PROXECTOS CULTURAIS REINO DE GALICIA 2025” E O ORZAMENTO DE GASTOS DA CONVOCATORIA

Don VALENTÍN GONZÁLEZ FORMOSO, Presidente da Deputación Provincial da Coruña

Despois de ver os informes do Servizo de Acción Social, Cultural e Deportes, da Secretaría Xeral e do Servizo de Fiscalización

RESOLVO:

Primeiro.- Aprobar as bases do III Certame “Fondo de proxectos culturais Reino de Galicia 2025”, que figuran no Anexo - Bases Reguladoras.

Segundo.- Dispoñer a publicación das bases no Boletín Oficial da Provincia.

Terceiro.- Aprobar o orzamento dos gastos derivados da convocatoria, que ascenden a un total de 203.000 €, de acordo co seguinte detalle:

Concepto	Aplicación orzamentaria	Importe	Documento contable RC
Premios	0612/3341/479	200.000 €	220240057605
Honorarios xurado	0612/3341/22609	3.000 €	220240057606

Contra a presente resolución, que pon fin á vía administrativa, pódese interpor alternativamente recurso de reposición potestativo, no prazo dun mes perante o mesmo órgano que ditou o acto, ou recurso contencioso-administrativo, perante o Xulgado do Contencioso Administrativo da Coruña ou daquel no que teña o seu domicilio o recorrente, á súa elección, no prazo de dous meses, a partir do día seguinte a aquel no que teña lugar a notificación. Se se opta por interpor o recurso de reposición potestativo non se poderá interpor recurso contencioso administrativo ata que aquel sexa resolto expresamente ou se produza a súa desestimación por silencio.

Todo isto, sen prexuízo de que se exercite calquera outro recurso que se estime pertinente.



DEPUTACIÓN PROVINCIAL
A CORUÑA

Servizo de Acción Social, Cultural e Deportes

Expediente: 2024000043886

ANEXO – BASES REGULADORAS

III Certame “Fondo de proxectos culturais Reino de Galicia 2025”

O coñecemento e socialización colectiva e compartida do pasado, da propia historia, veu constituíndo unha das liñas de acción cultural e educativa máis relevantes dos poderes públicos en calquera sociedade e época.

As circunstancias históricas e políticas fixeron que na construción e difusión social da explicación do pasado propio Galicia carecese de ferramentas capaces de garantir a investigación, a fixación, o ensino e a reprodución do coñecemento neste campo. Aínda hoxe segue a ser unha carencia notable no que atinxe a determinados ámbitos. Nas décadas dos 70 e 80, por exemplo, a historia medieval de Galicia apenas existía nos plans de estudo da Facultade de Xeografía e Historia da Universidade de Santiago, e cando aparecía nunca era desde o enfoque do estudo da historia política. Xeracións de alumnos e alumnas formáronse con base nuns contidos en que existía con centralidade o relato político construído da Historia de España (íberos, visigodos, reconquista, Reis Católicos, Austrias, Borbóns), mais onde non tiña cabida o nacemento, consolidación e desaparición do Reino medieval de Galicia, desde a Galicia sueva até a división provincial de Javier de Burgos en 1833. Só a partir dos anos 90 esta situación comeza a mudar, grazas fundamentalmente ao traballo entusiasta de persoas historiadoras e ensaístas que sinalan nas súas publicacións a necesidade de poñer o foco sobre a historia medieval galega, verdadeira época de esplendor social, cultural e económico que, porén, se mantiña oculta á sociedade galega actual.

A Deputación da Coruña, desde o exercicio das súas competencias no ámbito da cultura, quere contribuír con esta convocatoria e con outras iniciativas que vai desenvolver nos anos vindeiros a combater a desmemoria e o esquecemento sobre o pasado medieval de Galicia. A sociedade galega actual precisa coñecer o seu pasado para comprenderse mellor na actualidade e poderse pensar con máis capacidade cara o futuro. A propia existencia e as relacións galegas con Portugal, os porqués da *inventio* da tumba do Apóstolo Santiago, o feito de que reis de Castela, Toledo ou León escribisen en galego e que nesta lingua florecese a expresión literaria máis relevante e culta do medievo peninsular, as tensións políticas e sociais do século XIV e XV, a conformación do Reino svevo de Galicia como o primeiro reino europeo, a verdadeira natureza histórica de figuras como Pardo de Cela, Xelmírez ou Don García, a revolta burguesa das Irmandades contra o poder feudal dos señores ou a propia existencia na actual Catedral de Santiago dun Panteón Real son algúns dos moitos elementos que nos interpelan aínda hoxe como sociedade, á espera de a través deles podermonos coñecer, recoñecer e interpretar de maneira máis consciente e rigorosa, á marxe de caricaturas ou paradigmas instalados durante séculos.

Co obxectivo de contribuír á socialización do coñecemento e do interese pola historia, as figuras, os lugares e os momentos do Reino medieval de Galicia, continuando coa iniciativa posta en marcha nos anos anteriores, a Área de Cultura da Deputación da Coruña convoca o III Certame *Fondo de proxectos culturais Reino de Galicia*, de acordo ás seguintes:



**DEPUTACIÓN PROVINCIAL
A CORUÑA**

Servizo de Acción Social, Cultural e Deportes

Expediente: 2024000043886

BASES

Primeira.- Obxecto.

O obxecto deste certame é apoiar especificamente os proxectos de carácter cultural que contribúan ao coñecemento e divulgación do Reino medieval de Galicia.

Nesta terceira edición o certame céntrase en dous ámbitos de contido:

A) Proxectos centrados na posta en valor patrimonial, turístico e socio-educativo do pasado medieval de lugares, vilas e cidades da provincia da Coruña, a través da actualización do seu relato histórico contextualizado no marco do Reino de Galicia.

Valorarase dos proxectos:

1. a renovación, adecuación e contextualización historiográfica do relato sobre o pasado e o patrimonio medieval do concello no marco dos estudos actuais sobre a historia do Reino de Galicia.
2. a capacidade dos proxectos para:
 - garantir a difusión e socialización eficaz cara a propia cidadanía (ensino, comercio, axentes locais), para que a poboación do propio concello gaña coñecemento do seu propio patrimonio e historia.
 - garantir a súa vinculación e aproveitamento para a explicación patrimonial e turística dos bens e elementos de interese, de maneira que os proxectos premiados sexan útiles para a actualización dos relatos e estratexias de posta en valor turístico e patrimonial dos concellos.

B) Proxectos centrados na difusión e posta en valor de figuras concretas do noso pasado medieval.

Valorarase dos proxectos:

1. a renovación, adecuación e contextualización historiográfica do relato sobre as diferentes figuras no marco dos estudos actuais sobre a historia do Reino de Galicia.
2. a capacidade dos proxectos para:
 - garantir a difusión e socialización eficaz cara a propia cidadanía, a través das estratexias comunicativas, socio-educativas e socio-culturais que o proxecto formule.
 - garantir a súa utilidade e aproveitamento para a vinculación dos proxectos a posíbeis estratexias de difusión cultural, patrimonial e turística.



**DEPUTACIÓN PROVINCIAL
A CORUÑA**

Servizo de Acción Social, Cultural e Deportes

Expediente: 2024000043886

1.1 Requisitos dos proxectos

Poderán presentarse ao certame proxectos que se vaian desenvolver do 1 de xaneiro de 2025 ata o 31 de decembro de 2025.

Só poderán presentarse ao certame proxectos orixinais e de autoría propia

Os proxectos desenvolveranse na provincia da Coruña e terán como destinataria/beneficiaria a poboación da provincia e valorarase a súa repercusión provincial

Os proxectos poderán desenvolverse en todo tipo de soportes e formatos, sempre que resulten axeitados para os obxectivos marcados.

Todos os proxectos deberán empregar a lingua galega como lingua vehicular, sen que iso impida que os contidos tamén poidan estar noutras linguas.

Do mesmo xeito, os proxectos usarán unha linguaxe inclusiva e con perspectiva de xénero nos seus textos e comunicacións.

Os orzamentos dos proxectos deberán adecuarse aos custos reais do proxecto a desenvolver.

1.2 Exclusiones

Non se admitirán proxectos cunha antigüidade superior a un ano ou que supoñan unha continuidade ou fases sucesivas de proxectos xa premiados noutros certames ou convocatorias da Deputación da Coruña en anos anteriores ou no presente.

Segunda.- Persoas ou entidades destinatarias

Poderán presentar os seus proxectos as persoas físicas inscritas no réxime especial de traballadoras/es autónomas/os, as sociedades cooperativas con ánimo de lucro, e/ou empresas que teñan domicilio fiscal nalgún dos concellos do territorio galego.

As persoas xurídicas deberán estar legalmente constituídas no momento de presentar a candidatura.

A persoa física ou xurídica, debe manter unha actividade económica continuada e permanecer de alta no IAE dende o inicio do proxecto ata a súa xustificación.

Dado que a tramitación será telemática as persoas solicitantes deberán dispor de:

- certificado dixital.
- un único enderezo electrónico de contacto durante a tramitación do expediente, ao que se dirixirán a s comunicacións.



**DEPUTACIÓN PROVINCIAL
A CORUÑA**

Servizo de Acción Social, Cultural e Deportes

Expediente: 2024000043886

Cada persoa ou entidade destinataria só poderá presentar unha solicitude. Esta limitación aplícase ás persoas físicas que formen parte de empresas ou entidades, de xeito que non poderán presentar máis dun proxecto.

A convocatoria tramitarase de xeito telemático, a través da plataforma de tramitación electrónica da Deputación (SUBTEL).

Terceira.- Dotación

O certame “Fondo de Proxectos Culturais Reino de Galicia” ten unha dotación de 200.000 €.

Convócanse 15 premios, polos seguintes importes máximos, que se reducirán de ser o caso se o importe do orzamento do proxecto seleccionado é menor:

- Para os tres proxectos con maior puntuación, 3 premios por un importe máximo de 20.000 €
- Para os cinco proxectos seguintes en puntuación, 5 premios por un importe máximo de 14.000 €
- Para os sete seguintes proxectos, 7 premios por un importe máximo de 10.000 €

Os premios poderán quedar desertos e o seu importe está suxeito ás retencións legais que lle sexan aplicables.

Os premios non poderán concederse a título póstumo, sen prexuízo dos dereitos de sucesión que poidan exercerse se a persoa beneficiaria falecese despois da decisión do xurado (no caso de persoas físicas).

A Deputación poderá publicar os proxectos premiados.

Cuarta.- Prazo, forma e documentación da presentación das solicitudes

O prazo de presentación de solicitudes de participación comezará o día 10 de xaneiro de 2025 e rematará o 11 de febreiro de 2025, logo da publicación do extracto da convocatoria deste premio no BOP da Coruña, a través da Base de Datos Nacional de Subvencións.

As solicitudes presentaranse de xeito telemático na sede electrónica da Deputación da Coruña, a través da plataforma de tramitación electrónica da Deputación (SUBTEL).

A solicitude e toda a documentación estará asinada pola persoa que presenta o proxecto.

A presentación telemática producirá plenos efectos xurídicos, sempre que a solicitude sexa presentada dentro do prazo establecido e na plataforma citada. Non se terán por presentadas as solicitudes que se acheguen noutros rexistros.

Serán rexeitadas automaticamente as solicitudes que conteñan documentos electrónicos que incorporen código malicioso ou dispositivo susceptible de afectar á integridade ou seguridade do sistema, omitan documentos esixidos, non se cumprimenten os campos



**DEPUTACIÓN PROVINCIAL
A CORUÑA**

Servizo de Acción Social, Cultural e Deportes

Expediente: 2024000043886

requiridos como obrigatorios ou cando conteñan incongruencias ou omisións que impidan o seu tratamento.

A **documentación** que se ha presentar é a seguinte:

No caso de persoas físicas inscritas no réxime especial de traballadoras/es autónomas/os:

- Acreditación da inscrición no Réxime Especial de traballadores/as autónomos ou alta na mutualidade na data da solicitude.

No caso de persoas xurídicas

- Escritura da entidade adaptada á lexislación vixente.
- Declaración responsable de que os seus socios, membros ou traballadores non concorren á mesma convocatoria.
- Declaración de que a empresa solicitante non ten concedidas ou solicitadas nos tres últimos exercicios fiscais, axudas por importe superior a 300.000, de conformidade co previsto no artigo 3 do Regulamento (UE) nº 2023/2831, relativo á aplicación dos artigos 107 e 108 do Tratado de funcionamento da Unión Europea ás axudas de minimis

Para todas as candidaturas:

- Nomeamento da persoa representante para a súas relacións coa Deputación da Coruña ou poder suficiente da persoa representante e asinante da solicitude para actuar en nome da entidade/ persoa
- Certificación de situación no censo de actividades económicas da AEAT, na data da solicitude.
- Certificacións das administracións tributarias correspondentes e da Tesourería da Seguridade Social nas que se acredite que a entidade está ao corrente nas súas obrigas tributarias e coa Seguridade Social. Poderá omitirse a presentación desta documentación sempre que autorice expresamente na Plataforma SUBTEL a consultas tributarias e non se opoña á consulta de datos da Seguridade Social.
- Memoria explicativa que inclúa:
 - Nome da persoa ou entidade que formula a solicitude.
 - Nome da persoa representante.
 - Título e resumo explicativo breve da proposta presentada: nome/título, obxectivos, contidos e actividades principais, desenvolvemento previsto, destinatarios, estratexia de comunicación, calendarización prevista. (máximo 10 liñas por apartado)
 - Descrición detallada do proxecto en relación aos catro aspectos que serán obxecto de avaliación.



**DEPUTACIÓN PROVINCIAL
A CORUÑA**

Servizo de Acción Social, Cultural e Deportes

Expediente: 2024000043886

- Plan de sustentabilidade do proxecto. Documento específico coas cláusulas sociais, de xénero e de sustentabilidade ambiental e lingüístico-cultural que integra o proxecto.
- Listaxe de patrocinios confirmados, a través de carta ou documento que o acredite, e no que figure o valor económico ou natureza do patrocinio.
- Orzamento total do proxecto, detallado por partidas, con e sen IVE.
- Declaración das fontes de financiamento do proxecto (achega de recursos propios, subvencións, patrocinios, outros recursos externos, etc).

Quinta.- Xurado

O xurado estará presidido pola deputada de Cultura, quen actuará con voz e sen voto, e formarán parte del tres persoas expertas propostas por ela.

As funcións de secretaría exerceraas a secretaria da Corporación, ou a persoa funcionaria en quen delegue.

Para o nomeamento do xurado respectarase a presenza equilibrada de mulleres e homes, en cumprimento do disposto na Lei 7/2023, de 30 de novembro, para a igualdade efectiva de mulleres e homes de Galicia.

As persoas que integren o xurado estarán sometidas ao deber de abstención nos casos sinalados no artigo 23 da Lei 40/2015, de 1 de outubro, de réxime xurídico do sector público.

A composición dos xurados daranse a coñecer, con anterioridade á súa reunión, no Taboleiro de anuncios da sede electrónica co fin de que se poidan interpor, se é o caso, os recursos legais pertinentes.

Para os efectos da validez da constitución do xurado aplicarase o disposto no artigo 17 da Lei 40/2015, do 1 de outubro, de réxime xurídico do sector público.

As deliberacións serán secretas e delas será estendida a acta correspondente.

A proposta de concesión que formule o xurado será obxecto da resolución da Presidencia, que resolverá a súa aprobación, previo informe do Servizo de Acción Social, Cultural e Deportes e do Servizo de Fiscalización.

O xurado poderá declarar deserto o premio.

Sexta.- Valoración e concesión

O xurado deberá desenvolver as seguintes funcións:

- a. informará sobre a adecuación de cada proxecto presentado ás bases da convocatoria. Poderá excluír, por maioría simple e con motivación argumentada, aquelas candidaturas que non se axusten ás presentes bases ou que incorporen un orzamento que non se adecúe ao proxecto presentado.



**DEPUTACIÓN PROVINCIAL
A CORUÑA**

Servizo de Acción Social, Cultural e Deportes

Expediente: 2024000043886

b. logo deste primeiro exame, e con base na análise da cada unha das memorias, o xurado valorará cada un dos proxectos tendo en conta os seguintes criterios:

- **Calidade, rigor historiográfico, sustentabilidade e solvencia do proxecto: ata 25 puntos.**

Valorarase a coherencia e adecuación orzamentaria do proxecto en relación aos seus contidos, a calidade e interese da proposta e a solvencia das persoas ou equipas que participen nel, o rigor no deseño da proposta e na proposta de desenvolvemento en relación aos obxectivos e segmentos destinatarios.

- **Interese do proxecto para a difusión social da existencia do Reino de Galicia: ata 25 puntos.**

Valorarase a capacidade de contribución do proxecto ao coñecemento social e divulgación do Reino medieval de Galicia. Terase en conta o impacto social, a capacidade de reclamo e repercusión, a efectividade divulgativa en públicos non académicos, o uso de estratexias de divulgación social en redes sociais.

- **Impacto socio-cultural na propia cidadanía. Ata 25 puntos.**

Valorarase a capacidade do proxecto para garantir a difusión e socialización eficaz dos contidos cara a propia cidadanía, a través das estratexias comunicativas, socio-educativas e socio-culturais que o proxecto formule.

- **Capacidade dinamizadora no territorio. Ata 25 puntos.**

Valorarase a capacidade do proxecto para garantir a súa utilidade e aproveitamento para a vinculación dos proxectos a posíbeis estratexias de difusión cultural, patrimonial e turística.

c. unha vez concedidos os premios, antes da produción final dos proxectos, o xurado revisará e dará conformidade aos guións definitivos do relato histórico de cada proxecto, para garantir a solvencia e rigor destes, podendo formular propostas de mellora ou corrección.

Sétima.- Pago

O pago dos premios realizarase conforme a seguinte distribución:

- **30% do premio polo proxecto**, unha vez concedido o premio, no prazo de dous meses a partir da data de resolución deste certame.
- **70% polo desenvolvemento do proxecto**, despois de que o xurado verifique que o proxecto se desenvolveu tal e como fora presentado e premiado nesta convocatoria.

O xurado deberá verificar que o proxecto desenvolveuse tal e como fora presentado e premiado neste certame, e se non se axusta ao inicialmente presentado non se aboará o 70% do importe do premio polo desenvolvemento do proxecto.



**DEPUTACIÓN PROVINCIAL
A CORUÑA**

Servizo de Acción Social, Cultural e Deportes

Expediente: 2024000043886

Para os efectos da dita comprobación, as persoas ou entidades premiadas deberán presentar antes do 30 de xullo de 2025 a seguinte **documentación:**

- Informe sobre o desenvolvemento do proxecto, acompañado de toda a documentación gráfica, mediática, etc que respalde o contido deste.
- Declaración de ratificación do desenvolvemento do proxecto.
- Declaración de que mantivo a actividade económica continuada, permaneceu de alta no IAE e no caso de persoas físicas de que se mantivo de alta no réxime de traballadores/as autónomos/as dende a presentación da súa candidatura ata o momento da presentación da xustificación.
- No caso de proxectos en formato físico, entrega de cinco exemplares de cada un dos produtos elaborados dentro do proxecto.
- No caso de proxectos de formato virtual, escénico ou presencial, dossier cos materiais audiovisuais, as ligazóns a contidos dixitais e outro tipo de contidos que demostren o desenvolvemento do proxecto

Documentación adicional no caso de que a persoa ou entidade non estea dada de alta na base de datos de terceiros da Deputación provincial da Coruña ou teña intención de designar unha nova conta bancaria:

- Designación de conta bancaria da entidade no modelo aprobado pola Deputación da Coruña, asinado co certificado de representación da entidade.
- Certificado acreditativo da titularidade da conta, emitido e asinado electronicamente pola entidade bancaria correspondente ou asinado co certificado de representación da entidade solicitante.

Oitava.- Obrigas

Son obrigas das persoas gañadoras, as seguintes:

- Utilizar o premio para o desenvolvemento do proxecto.
- Incluír o logotipo da Deputación da Coruña e o da área de Cultura (A Cultura É Un Dereito) en toda a información impresa, informática ou audiovisual relativa á iniciativa premiada.
- Incluír ou etiquetar nas publicacións relativas á iniciativa premiada aos perfís da Área de Cultura da Deputación: @DACCultura no TWITTER e <https://www.facebook.com/daccultura/> no FACEBOOK.

Novena.- Protección de datos



**DEPUTACIÓN PROVINCIAL
A CORUÑA**

Servizo de Acción Social, Cultural e Deportes

Expediente: 2024000043886

Os datos facilitados serán tratados pola Deputación da Coruña coa finalidade de tramitar esta convocatoria.

A participación nesta convocatoria implica aceptar a realización de fotografías e/ou vídeos pola Deputación da Coruña no certame de entrega dos premios e na realización de actividades complementarias, que poderán ser publicadas en:

- A páxina web e perfís en redes sociais da Deputación.
- Filmacións destinadas á promoción da actividade.
- Publicacións para dar a coñecer a actividade.

A lexitimación para o tratamento dos datos persoais baséase no cumprimento dunha misión de interese público.

Os datos poderán ser comunicados ás Administracións públicas para o exercicio das súas competencias e serán conservados de acordo co establecido na normativa de arquivo.

As persoas interesadas poden exercer os dereitos de acceso, rectificación, supresión, oposición, limitación ao tratamento e portabilidade dos datos a través da sede electrónica da Deputación da Coruña ou presencialmente nos lugares e rexistros establecidos na normativa reguladora do procedemento administrativo común. Así mesmo se considera que o tratamento incumpre co establecido no RXPd pode reclamar perante a AEPD.

Poden consultar máis información relacionada coa protección de datos na nosa [Política de Privacidade](#) ou dirixindo un correo a delegadodeprotecciondedatos@dacoruna.gal.

Para calquera outra dúbida relativa á protección de datos poderá dirixirse ao Delegado de Protección de datos da Deputación a través do seguinte correo electrónico: delegadodeprotecciondedatos@dacoruna.gal

Décima.- Aceptación das bases

A participación nesta convocatoria supón a total aceptación destas bases.